

1 Pita

1 ¹Ijai Pita, Jesus Kristus san aposel. An tamolpein Anut ipilianan go aņanem panu fun abiseig aug, Pontas na, Galesia, Kapadosia, Esia agod Bitinia na, aben a lulunad lo tamol gol ak igo won amado dan, aņsam na girek en ņigire da. ²Bai Anut gubak mi an gamugo alasa yan san saen lo ilian ilon go ipilianan an lo Awan Urgun iņsan urat lo an iņanen tamolpein gun ak alasa ya. Agog an iņanen tamolpein awa bek san ago mi amado ator a, agod Jesus Kristus iņanen dar ikulmaek an lo aņsam aupasek isuas panan a.

Anut iņsan ilo panek, agod iņsan ilo maror ipanan pe ilom lo italbusip tubun ilasa wan o ņugudani da.

Id kumaen foun ak tile wa

³Id Bai Anut, idsad Tubun en Jesus Kristus san Taman per tupani da. Man dugo, iņsan ilo muņanek tubun an lo, id ibol nanuk foun ak on tilasa ya. Ago yan lo id Anut tile san niņen o patud isa wa, agod tini ganei en ibol mel kumaen imat san tia yak igo won tabi sakar da. Mel en Jesus Kristus maten lo kumaen imasa yan lo ilasa ya. ⁴Id nanuk foun tilasa yan lo Anut san mel uyan uyan ak lak na yen dan, in ipilianad pe murna gup an fidian tiņane wa. Melmel en ta idafur na wa, tamolpein sad aupasek iganep melmel an nun dilasa san tia ya, agod an sad leil siņaokan an ta saian na wa. Melmel en murna san an Anut kumaen panu na an niņemi wo kagin ipani da. ⁵An ilom rumok ak lo, Anut san dabai an dumui on ibargiran an da, an lo patu pasek a saen wadan lo Anut iganep ilasa wan ale wa. Patu pasek an Anut ikubune lag yen da, ago yaup saen wadan a Anut ipate yan lo kuai isi wa. ⁶Ak man gamu saen katukan en lo muruan sensen ak ale da, ago bo man arut amoi. Tia, uyam isusa wa, ⁷man dugo, muruan asini dan lo fidian dile wak aņanem ilo rumok Jesus Kristus lo yan rumok a. Anut malan lo aņanem ilo rumok an siņaokan mok a, agod an gol san naon iriņani da. Rumok, gol san naon an tubun kasik bo man, dibitinae san niņen yai lo diganep dumari dop, siņsak dupasip an lo iņanen naon yaup lak na mok a. Ago bo man, murnap gol in tan en da itout yau a. Nek ago mi, Anut aņanem ilo rumok ibitinae o ilian funan

dugo muruan ale ya, bitinaek an lo Jesus Kristus kuai isi san saen lo aŋ per, girager, agod yaŋak tubun ak aŋane wa. ⁸Aŋ iŋ ta ale na ya, gug iŋ niŋen o amat da. Gamu dam aŋ iŋ ale san tia bo man, iŋ o ilom lo rumok a. Agod aŋ yousai anda mi aŋanefute da, an lo dop aŋanem ilo uyan an tubun kasik an lo niŋeŋ ta aŋiŋeŋ san tia ya. ⁹Agod aŋanem ilo rumok san nuŋon man aŋsam ŋutumi Anut iŋiliali pe sasau lo idirai a.

¹⁰Profet adi saen ilo panek a Anut ipanaŋ an niŋen dubol ilasa dan lo, patu pasek en san fun dile wo abaŋ an diabi siŋaokan da. ¹¹Saen Kristus san Ur iŋ ilod lo imado dan Kristus san madai agod iŋsan yaŋak tubun ak mitep iŋane wan ikubiai pidinai dan, iŋ Anut dusumiani ak, mel dugon boi, tia, nal dugon boi, niŋen o Urgun iŋiŋeŋ da. ¹²Gug iŋ mel a diŋiŋeŋ ilasa dan sed ibinawai san o ta diŋiŋeŋ da, tia, aŋ o dubol ilasa dan Anut ikubiai pidinai a. Melmel an san niŋeŋ an aloŋ la ya. Dugo woŋ ak i? Bilaluŋ tamol an Urgun kumaen panu na Anut igane idu yan san dabai lo iŋsan ru uyanan an dufulale aŋsam na ilasa ya. Eŋel adi dam maladi lo melmel an san fun dile wo dumat geig da.

Gun amado

¹³Ago yak niŋen o kabuŋam akubune uyanan pe urat niŋen o tawaŋ agane dop, sem ulum am abi uyanan dop, ilo panek san binawek a saen Jesus Kristus kuai isip aŋsam na ipalu wan mi tinim agane pani wa. ¹⁴Aŋ imug aŋaŋ dugo amado se ya, ago dugo kagin naok naok a ilo masa igane ilasa se yan ari na ya, gug gamu nek ibol nanuk awa bek san igo woŋ, aŋ kagin an fon mi ta atutuŋani na wa. ¹⁵Tia, nek ibol Iŋ a aŋ igian an iŋsen gun imado dak igo woŋ, aŋsem dam sam urat fidian lo gun amado wa. ¹⁶Man dugo, Anut san girek ago ibol a, “Ŋai gun ak niŋen o, aŋ dam gun amado.”

¹⁷Agod Anut a titiŋae tamol igo woŋ tamolpein kisaek kisaek sad urat bitinaek lo idiri dan niŋen o aŋ Bai abol tap, aŋ saen tan en lo amado dan, ibol tamolpein asau ak igo woŋ arer dop aŋsam madok an kagin apani uyanan a. ¹⁸Aŋ aloŋ ak, Anut aŋ tubumi sad kagin nuŋon tia man dupanaŋ an lo idad go ipasaŋ iŋiliani a. Mel ta itout yau san ibol silva gol da igo woŋ ak lo aŋ ta idad go iŋiliani na ya. ¹⁹Tia, Kristus man ibol sipsip nanun nun aman tia, agod baob aman dam tia yak igo woŋ, iŋsan dar naon lak na geig ak lo ipasaŋ go iŋiliani a. ²⁰Tan en gamugo ilasa dugo Anut Iŋ ipiliani a, gug gamu saen en san wadan lo aŋ niŋemi wo Anut igane walal te ilasag ale ya. ²¹Kristus lo aŋ fun aganeg Anut a iŋ mateŋ lo ifufunig kumaen yabisag yaŋak tubun ak ipani an ilom lo rumok a, ago yan lo gamu aŋanem ilo rumok agod aŋanem tini ganei dam diaug Anut lo dututou da.

²²Aŋ ru rumok ari apani na yan lo aŋ gamu ŋutumi adiraig gun dilasag, an lo aŋanem Kris teim taom niŋedi wo amat dan, an mi nuŋon

a. Amaiak ningen o an ilom ntutum rumok amam da nug ningen o amat a.
 23 Man dugo, ai patun kitekan yen pe itout yau san an lo an foun ak igo
 won ta alasa na ya. Tia, ai patun a itout yau san tia yan lo tamolpein foun
 ak alasa ya. Ai patun an man Anut san ru kumaen ak, agod pempem yen
 yau san an mi a. 24 Man dugo, Anut san girek ago ibol,

“Tamolpein tinidi man ibol gafurfur on a,
 agod insad damag fidian an ibol boban on a.
 Gafurfur igos idu da, agod insan bob dam diau dudu da.

25 Gug Tubun en san ru man pempem yen yau da.”

Ru nek an man bilalun uyanan ak ansam na dufulale dugo alon a.

2 1 Amaiak ningen o an ale saian san kagin fidian, rawek fidian, balek
 uraru san kagin, mala sek san tinjae saian, agod uf ru a fidian
 bubem lo ale dan, ananep abiliau a. 2 An ibol nanuk foun ak igo won, su
 ta dukubuli na yan Urgun ipana an aluk o amat geig a. An ago agane
 dop man ka atalbusi dop an lo sasau a Anut ipanad an anane wa. 3 Man
 dugo, an Tubun en san bulbal akubianig ale alon la ya, in mi uyanan mok
 a.

Pat kumaen yen dak san ningen

4 Insen mi pat kumaen yen da. Ago dugo tamolpein in diabiani ak gug
 Anut in ipiliani a, agod in malan lo pat an naon lak na geig a. An naon na
 au dan, 5 an dam pat kumaen yen san ago mi Anut itumanan dop insan
 ntutum san ab on isuse da. An lo an pris adi gun ak on alasa ya. Nek ibol
 pris wagam ak Anut yai dutuni pani na yak igo won, an dam yai atuni
 pani da. Gug kulob an man tan en san yai tuneke tia, tia, an ntutum san
 yai tuneke mi a, agod Kristus lo Anut in uyan ipana da. 6 Ru girek lo ago
 ibol,

“Ale, nai pat ta Saion na nguni a.

Sukurun yabituani san pat an pilianek la ya, agod naon lak na
 geig a,
 agod tamolpein in o ilod rumok dan,
 miai ta ifu na wa.”

7 An tamolpein ilom lo rumok dan ansam leil lo pat en naon lak na geig a.
 Gug aenkadi ilo rumok amad tia yan insad leil lo,

“Pat a ab susek tamol dibiti an murnag ab sukurun isinig itur a.”

8 Agod afon,

“Pat an igane dop tamolpein ate njed dusue dak,
 agod igane dop ate diau dudu da.”

Man dugo, in Anut awan ta diri na da, an lo diau dudu da. In ago digane
 san Anut ipilianai a.

9 Gug an man Anut san tamolpein insen ipilianan a. An man Kin
 san pris adi, tamolpein gun ak sad midaen, agod Anut in muroun a.

Ansam urat man, in a an igian go tidom tubun an abiseig, in san lilaman sijaokan ak lo aladu yan lo, in anen bunun uyanan an ninen abol ilasa wo ago igane ya. ¹⁰Imug na man an tamolpein warou kisaek tia ya. Gug gamu an Anut san tamolpein alasag amado da. Imug an in san ilo mujanek ta anane na ya. Gug gamu an in san ilo mujanek anane ya.

¹¹O turag muroug, an man ibol tamolpein panu sen ak san apalug tan en lo tamol gol ak on amado da. Amaiak ninen o, nai nususunanan pe tinim san ilo masa ari apani wo amoi a. Man dugo, kagin saiak an gutum san ager imado da. ¹²An gob adi lulugad lo ananem nao lalek pempem uyan an mi yen a. Gidad gamu an agane saian dak dubol a. Gug saen Anut idsad na ipalu wan te gup ansam kagin naok naok a dile la yan ninen o Anut yanan diabisa dop per dupani wa.

Gurman paed na amado

¹³Tubun en yanan o tan en san gurman fidian paed na amado. Rom san kin in malan te yak ago abol a, agod paen na amado wa. ¹⁴Agod gabman gurman dam paed na amado wa, man dugo, Anut in ipilianai man tamolpein a dugo digane saian dan bu dupidinai san urat digane da, ago dop a digane uyan dan in uyan dupidinai san urat dam digane da. ¹⁵Man dugo, Anut san ilo ibol igo ya, an uyan agane dan lo tamol burau ak sad ru njeo dubol dan sad awad afutani da. ¹⁶Tamol in sen kisaek imado dak igo won, an ago amado wa. Ak gug, an lo amianuk dop kagin saiak saiak ta agane na wa. Tia, nek Anut san urat tamol mok igo amado wa. ¹⁷Tamolpein fidian yanad asini wak, teim taom Kris adi ninedi wo dam amat a. Anut ninen o arer dop, Rom san kin dam yanan abisa wa.

¹⁸An bigabeg man ananem titianek paed na mok, tok abol amado wa. Titianek tamol uyadi a kagin dupanan dan lo ago agane wa, a muruan dupanan dan lo dam nek ago mi agane wa. ¹⁹Man dugo, tamol ta san kankan Anut lo yen dop, an lo madai muruan da isini san tia yak isini tap man, mel sijaokan geig a. ²⁰Ak man on gane saian ak san bu nane dop lo utur sakar tap, an naon Anut dugo ipitiano wak i? Gug on uyan gane yak lo madai ule dop lo utur sakar tap man, Anut malan lo an ipitiano san mel igo won a. ²¹Anut ago wo an igian a. Man dugo rumok, Kristus in sen an abemi lo muruan isini a. Saen tan ibisei an lo in san kagin naok naok man mitilaen igo won ibisei panad an lo tile dop nien aban turi wa.

²²“In aupasek ta kisaek igane man tia ya.

Agod awan lo ru sewak ta ilasa man dam tia ya.”

²³Saen tamolpein in dimisilani se man in ru naon ta ipidai na ya. Saen in madai dupani an in naon igane wo ta ibol na ya. Tia, in sen Tamol a san bitinaek itaot mok an banin lo igane ya. ²⁴Kristus in sen tinin nam aigim fo idsad aupasek fidian isini a. Ago dop an lo id aupasek san dabai lo ipasad pe, idsad madok lo itaot tumado wa. In tinin dufunig ikafut idiri

an lo ikubiniar a. ²⁵Man dugo, ar ibol sipsip dal dijaar ak ar adeg au a. Ak man gamu arjanem Titianek san na amul apalu ya. In mi arsam kagin Panek Tamol.

Nug iwon iwon sad ru

3 ¹Nek imug bigabeg inaned gurman paed na dumado se ago mi, ar pein dam iwom paed na amado wa. Aria, dal an lo aenkadi Anut san ru ta duri na tap, iwodi sad kagin naok naok an dile dop ate ilod dijarne dop ilod dibileksa wa. An man ilo inane san ru ta pein awad lo ta ilasa na ya. ²Man dugo, ar Anut ninen o arer dop arsam kagin gun ak lo amado dan in dile wa. ³Ar tinim san damag patun fo yak asinip nam tinim bala apani wo kankan tubun mi ta agane na wa. Dar diturne idu, kululoi naon tutubun agod biour sijaokan adiri dan an mel kawan a. ⁴Tia, arsam bala man kagin dugon ar ilom lo yen dan an mi a. Ar ilom man mosan, agod dagoman a. Bala naok ago yak man itout yau san tia ya, agod Anut malan lo an man naon lak na geig a. ⁵Man dugo, wagam dal kisaek an lo mi pein gun ak Anut tinid dupanig dumado se yan in sed damag ipidinai sijaokan a. Ago dugo iwodi awad paen na mok dumado na ya. ⁶Nek ago mi Sara dam Abraham awan paen na imado dop ninen o inanen tubun ak ibol se ya. Ar uyan agane dop mel ta urer ipanar san ninen o ta arer na tap, ar in san nanun muroun alasa wa.

⁷Nek dal kisaek ago mi, ar tamol iwom da sisem amado dan, pein in dabai tubun amad tia alor an ninen o yaradi abisa fufei wa. Man dugo, ar sisem Anut san ilo munane lo kumaen arane wa. Ar ago agane tap, arsam gudanek an kawan tia ya.

Melmel uyan ak san madai arane wa

⁸Inaine ru kagin wadan igo ya. Ar fidian kankan kisaek, agod nug ilon imunani wa. Nug tein taon igo wor nug ninen o amat a. Nug ninen o bubem apasi wak, sem ibiar adu dop aenta dirinar ak ago ilom isou wa. ⁹Ta diginiar saian tap, naon dam ta aginai saian na wa. Ru saian nam dupaiar tap, naon dam ta amisilanai na wa. Tia, an naon Anut bar uyan ak ipidinai o agudani wa. Man dugo, Anut ago wo ar igiar a. Agop an lo, bar uyan ak ka ipanar a. ¹⁰Man dugo, Anut san ru ago ibol a,

“Talpein ta madok uyan ak lo imado wo imat,
agod melmel uyan ak ile wo imat tap,
ru saian ta ibol na wa,

agod awan lo dam ru rawek ak ta ilasa na wa.

¹¹Kagin saiak patun ipanip kagin uyan ak mi igane wa.

Maror san dal o abar yabi dop an ile wo yaes isofutani wa.

¹²Man dugo, Tubun en malan yang tamol itaot ak yil pasai da,
agod in sad gudanek lo pempem kududon igure da.

Gug tamolpein a saian digane dan ninen o naon ikafut pidinai da.”

¹³Aria, aŋ kagin uyan ak agane wo yaes isofutanəŋ dop, enti maeg iganep saian ipanaŋ ak i? Tia geig a. ¹⁴Gug kagin itaot ak agane san o madai asini dan an rumok tap, gidad, aŋ man bar ŋanek tamolpein mok a. A muruan dupanaŋ dan niŋedi wo ta arer dop ilom ta muruan na wa. ¹⁵Tia, nek aŋ bubem lo Kristus aganep aŋsam Tubun ak oŋ ale wa. Aŋanem ilo rumok ninen o kankan aŋane fufei dop man, talpein aŋanem tini ganei Kristus lo yak a ilom lo yen dan san fun afulale wo isumianaŋ tap, ru ilo safulalek san ka apani wa. Gug pasak na mi agod urer amam da ago agane wa. ¹⁶Aŋanem kagin naok naok atitiani uyan dop man aŋanem kankan muruan ta ipanaŋ na wa. An lo dop tamolpein a aŋ kagin uyan uyan Kristus lo agane san ninen o dipirgini dop dimisilanaŋ dan miai ifunai a. ¹⁷Man dugo, Anut ilon ibol tap aŋ kagin uyan ak ninen o madai asini san man uyan a. Kabelan saian agane san ninen o muruan ale banaui. ¹⁸Man dugo rumok, Kristus iŋsen saen kisaek o lian aupasek ninen o mateŋ ile ya. Iŋ man tamol itaot ak igo woŋ aŋ tamolpein ta itaot na yan aŋsam abem iŋane ya, an lo aŋ iŋiliaŋ pe Anut san na au a. Tinin tan san en lo dufuni imat a, gug ŋutun lo Anut iganeg kumaen ilasa ya. ¹⁹Ago dugo ŋutun yaug wagam san tamolpein a ŋutudi subanek lo dumado se yan naod na ru ifulale ya. ²⁰Tamolpein an wagam Anut awan diparsisali se ya. An Noa san saen lo Anut ka yil fu oŋ dugo yaug Noa wog tubun ak ifoug urat itout a. Nal an lo tamolpein wei tia, 8 mi, wog an ilon lo iŋal go, lom tubun ak san you lo patud ipasi a. ²¹You an man Kris fulanek san mitilaen igo woŋ a. Man dugo, gamu fulanek san you an id patud ipasig tumado da. Fulanek an tinid sad nun ta ifulani yau na da. Tia, fulanek tile dan lo Anut tusumiani dak id ilod ikubunep kankan uyan ak ipanad a. Fulanek an nek Jesus Kristus mateŋ lo kumaen imasa yan lo mi dabai iŋaneg an lo id patud ipasi da. ²²Iŋ kumaen panu na isidag Anut giraŋen won ak lo imado dugo eŋel adi, ur sensen sad gurman adi, agod mel dugon dabai amad da atna dumado dan, an fidian paen na dumado da.

Anut san ilobol paen na tumado da

4 ¹Ago yak ninen o, Kristus tinin tan en san lo madai isini ak ninen o, aŋ dam ilo isou kisaek an mi abi sakar a. Dal an lo madai asini san ninen o aŋ sem dabai ipanaŋ a, man dugo, talpein enti tinin sen nam madai isini tap, aupasek san kagin an ibisei a. ²Ago yak ninen o iŋsan madok tan en lo tamolpein sad ilobol an iri san ilon ta yen na da. Tia, Anut san ilobol an mi iri ipani wo ilon yen da. ³Inug aŋ saen tubun mi gob adi sad kagin diri wo dumat an aŋ dam ago agane na ya. Agod aŋ kagin an arig yaug idaisida ya. Aŋ se pitianoŋ kagin, ilo masa san kagin, jeit kagin, soubul gidigidad lo, lukluk san ŋitaŋat amado dugo, tubud

sewak adi ubou ad tile san Anut geg igane yan ari apani se ya. ⁴An gamu inj luad asap kagin saiak saiak wei mi a digane dan lo dida asourubep, au o afon ta agane na dan ninjen o durut saian geig a. An lo an dumisilananj da. ⁵Gug Anut mi inj tamolpein a kumaen dumado dugo a dumat la yan bitinaek lo idirai san tawanj igane dan, naon na dutur dop inj o ru naon dupani wa. ⁶Nek fun amaiak ninjen o Kristus inj tamolpein dumat la yan sad na yang bilalun uyan ak san ru ifulale dugo dulonj a. An lo gidad, inj tinidi tan en san lo tamol sad bitinaek dile ya, ago bo man inj ntud lo kumaen a Anut da yan, inj dam kumaen an lo ka dumado wa.

⁷Mel fidian itout yau san saen sumeik ipanad da. Ago yak ninjen an kabunjam ipasti dop sem ulum am abi o uyanan a. Ago dop man ka agudani uyan a. ⁸Mel malan te man ilom ntumi fidian nug ninjen o amat a. Man dugo, nug ninjen o amat dan san kagin aupasek wei mi imianai idu ya. ⁹Nug kagin apani uyan dop, an o ta anurnur na wa. ¹⁰Dabai dugo aenta abinawai san Anut an kisaek kisaek ipananj an kagin apani wo uyanan a. Awa yabek tamolpein igo wonj Anut san ilo panek inanen dal kisaek kisaek atem urat apani wo uyanan a. ¹¹Ta inj ru ifulale san manau aman da tap, nek ibol Anut san ru mok mi ifulale dan igo ru ifulale wa. Ta inj binawek urat igane tap, dabai a Anut ipani dan lo urat an igane wa. Ago dop urat fidian lo tamolpein ka Anut per dupani wa, an man Jesus Kristus lo mi a.

Onj Kris ak ninjen o muruan sini

¹²O turag muroug, an bitinaek wananan geig ale dugo amasa saian an mel naok foun ilasa yak igo abol banau. ¹³Tia, youm isa wa, man dugo, an Kristus da sisem mi muruan asini da. An lo saen Kristus san girager kuai isi wan ate dop ilom uyanan geig a. ¹⁴An Kristus yanan ninjen o saian dupananj tap man an tamolpein Anut san bar anane ya, man dugo, Ur a Anut san agod girager san an an tinim lo yen da. ¹⁵Kabelan ta an lulunjam lo tamol ifuni imat o boi, tia gumagam o boi, tia kagin saiak funfun igane wo boi, tia, njnenj o kabunan isou imug dop, mel naok an fidian njedi wo madai isini banau. ¹⁶Gug anj Kris igo wonj muruan asini tap, miai ifunanj amoi. Tia, an Anut yanan abisa wa. Man dugo, inj yanan an tinim lo yen da. ¹⁷Anut bitinaek igane san saen ipalu la ya. Agod fun iganeg, ilo rumok tamolpein adi malan malan ibitiniai da. Aria, id lo fun igane tap, tamolpein a Anut san bilalun uyan ak ta diri na dan sad wadan an dugo wonj ilasa wak i? ¹⁸Agod afon, Anut san ru igo ibol, “Tamol itaot ak patu pasek lo iladu san ta pasauman na yan rumok tap,

tamolpein a au dupas dan ago Anut san kagin inj lo tia yan muruan dugo insad na ilasa wak i?”

¹⁹Amaiak ninjen o, ensauta inj Anut san ilo ibol lo madai dile dan, sed idiraip Anut banin lo diau dop urat uyan ak mi digane yau a.

Gurman iŋ pinein da sad ru kagin

5 ¹Ŋai matu gurman aŋ luluŋam lo dumado dan, ŋai dam nek iŋ ago mi ŋumado da. Ŋai dam Kristus madai isini an seg malag mok nam ŋile ya. Taida mi ŋaiseŋ dam iŋsan girager murnap kuai isi wan ŋai dam an lo ŋumado da. An lo igo ŋusumianaŋ o da. ²Aŋ Anut san sipsip atirnai o ipanaŋ an atitianai a. Gurman mok oŋ kagin apidinaŋ a, aŋ talpein a dusou dudunaŋ dan niŋen o ago ta agane na wa, tia, an nek aŋanem ilobol lo mi a, nek ibol Anut aŋ o ilon yen dak ago mi a. Aŋ moni aŋane san o malam ta isi na da, ak man urat an agane wo bubem yen da. ³Aŋ sipsip a Anut banim lo idirai an ŋai-ŋai kagin lo atirnai amoi. Gug aŋsam kagin an ibol mitilaen igo woŋ Anut san sipsip dile dop duri wa. ⁴Agod saen sipsip titianek sad gurman ipalu dop, girager san lilit gumuran ta itout yau dan aŋanem urat naon oŋ aŋane wa.

⁵Aria, aŋ pinein dam tamol busumadi ak paed na amado wa. Aŋ fidian nug naon na sem ibiaŋ adu wa. Man dugo, Anut san ru ago ibol a, “Tamol sed yaŋad diabisa dan Anut naod yabi da.

Gug tamol sen yabi idu dan iŋsan ilo panek ipani da.”

⁶Ago yak niŋen o aŋ sem ibiaŋ adu dop Anut tuon dabai an paen na aladu wa. An lo murnap saen mok fo iŋ ka aŋ ibiaŋsa wa. ⁷Aŋanem ilo muruan fidian banin lo agane wa. Man dugo, iŋ malan lo aŋ mel tubun an lo iŋ aŋ kagin ipanaŋ da.

⁸Malam ipuk pe tawaŋ agane dop, sem ulum am abi uyanan a. Man dugo, aŋanem ager Satan ibol laion imatigen ak ibob dugo tamol ta yani itout o abaŋ isueg itor dak igo woŋ a. ⁹Ago yak niŋen o aŋ naon abi dop aŋanem ilo rumok lo mi atur sakar a. Man dugo, aŋ aloŋ ak aŋanem teim taomi tan titin fidian lo muruan naon kisaek anami disini da.

¹⁰Agod Anut iŋ mi ilo panek fidian san muroun, iŋsen Kristus lo igiaŋ go iŋsan aben a girager anda pempem yen oŋ dan lo aladu wa. Saen katukan mi madai asini gup iŋsen mi aŋsam madok ikubunep lo atur sakar dop dabai ipanaŋ a. ¹¹Iŋ mi dabai pempem yen yau oŋ dan aman da ya. Rumok.

Ru wadan

¹²Ŋai girek katukan en Sailas ibinawag go ŋigire ya. Iŋ niŋen o ŋai ilog rumok ak, iŋ Kris tamol mok a. Girek en lo ŋai aŋ tan suek ru ŋupanaŋ, agod ru e ŋurupaiaŋ den man Anut san ilo panek mok a. An lo atur sakar a.

¹³Midaeŋ Anut ipilianai go Babilon na dumado dan iŋsad ilo uyan ru aŋsam na digane ipalu ya. Ŋai nanug Mak dam ago igane ya. ¹⁴Kris kagin lo nug banin abi wa.

Aŋ fidian Kristus da amado dan ilo maror aŋ lo ka yen yau a.